

# Memia bia sa vonzei esser damemia

Igl Appenzell Dado ha memia biars e la destinaziun turistica da Flem, Laax e Falera ha punctualmeim memia biars: Hosps dil gi che «inundeschan» la cuntrada, suroccupeschan ils parcadis e lain anavos dabia rumien. La regenza digl Appenzell Dado vul dar damogn al turissem dil gi cun ina nova strategia e la destinaziun entuorn igl Uaul grond appellescha alla cunscienza.

ANDREAS CADONAU/FMR

Els hagen stuiu midar strategia, gi il suprastont communal e responsabel per la fatschenta turistica dalla vischnaunca da Trin, *Hans-Jakob Telli*. «Duronc ils onns da corona ei l'Alp Mora sur Trin stada inundada da hosps dil gi che han contonschiu l'alp cun autos e campers.» Carmalau ils hosp sin l'Alp Mora han ils aschinumai mulins da glatscher dalla Val Maliens. Bugneras naturalas ch'envidan da far bog. Carmalau ils hosps dil gi han agnamein las bialas fotografias derasadas stedi da hosps dils mulins via las plattafuormas digitalas.

## Al cunfin

Il cantun Appenzell Dado vul midar sia strategia turistica, sco quei che SRF ha rapportau il margis vargau. La regenza appenzellesa ha presentau al parlament ina nova strategia turistica. Ina che vul promover pli fetg il turissem durabel e sminuir las roschas che vegnan la damaun e van la sera. Buca meins che 1,8 milliuns turists han visitau igl onn vargau igl Appenzell Dado e biars da quels han visitau ils puncts ils pli tschercai: il Seetalpsee e l'ustria Àscher. L'ustria che sesanfla en il liug spectacular sut ina preitcrap. Il maletg da quella uustria ha buca sulet embelliu ina revista mundiala, mobein ei vegnida derasada milliuns ga via divers forums digitalas. E carmalau gleud che lai bein biars daners ellas ustrias. Che procura era per parcadis pli che pleins e dabia maluorden. Il parlamentari cantunal *Christoph Keller* ha gett viers SRF: «Jeu manegiel ch'ei tonschi.» Ed era il cusseglier guvernativ, il landamma *Roland Dähler* vesa cunfins: «Nus stuein anflar in equiliber sanadeivel denter turissem e natira.»

## Serrau la via

Quei equiliber denter turissem, natira ed agricultura ei era impurtonts alla vischnaunca da Trin, sco quei che Hans-Jakob Telli gi: «Trin ei plitost ina destinaziun dil



La vischnaunca da Trin ha serrau la via ella Alp Mora per buca surcargar ils mulins da glatscher dalla Val Maliens.

FOTO UNUN DA TRAFIC TRIN

«Nus luvrein denton buca cun da quels che drovan nossa destinaziun sulet per inscengar sesez.»

André Gisler,  
directur da turissem

turissem migeivel.» Il suprastont communal declara che la vischnaunca hagi serrau igl access ella Alp Mora per il traffic individual. «Ei dat aunc lubientschas da carrar per ils possessurs da tegias da cuolm e per ils purs.» Duronc la stad meina in bus duas ga per jamna ils turists ell'Alp Mora. La strategia communal ha success sco quei che Hans-Jakob Telli explichescha ed el fa attent al resun positiv che la vischnaunca hagi retschert da hosps ed indigens. «Biar ein vegni perscharts ch'igl ei era bi dad ir a pei ell'Alp Mora.»

## Dilemma dalla reclama

Co il cantun Appenzell Dado vul contonscher sias novas finamiras turisticas ha la emissiun da SRF buca tradiu. Scumandar ni impedir che las bialas fotografias fan la currella ella reit san ins buc. Da quei ei era il directur turistic dalla Arena Alva, *André Gisler* perscharts. Ed el ei era cunscients che la promozion turistica sesanfla empau en in dilemma pertuccont la reclama via instgram e consorts. «Secapescha che nus duvrein quels mieds per far reclama per nossa destinaziun.» La destinaziun lavura era cun aschinumnadas influenzadras ed influenzaders. Persunas che vendan sesez ed auter via diversas plattafuormas. «Nus luvrein denton buca cun da quels che drovan nossa destinaziun sulet per inscengar sesez.» André Gisler tschontscha dad ina strategia da far attent ils hosps da vacanzas allas bellezias dalla natira e da proteger ellas. «Nus mussein negins bikers ni viandonts per exempel el Plaun Segnas per buca carmalau ils hosps en quei plaun.» La destinaziun fa denton reclama cun ina fotografia generala dil Plaun Segnas. In auter hotspot per la destinaziun da Flem ei il Lag la Cauma. Cheu tschontscha André Gisler dalla pusseivladad da restrencher las entradas per limitar il diember da hosps. Il directur turistic ei numnadamein perscharts che memia bia sa beinprest esser damemia e quei ei buca d'engrau al turissem.

# No Future – il tschunavel

Gl'onn 2001 ha la historia da quella band entschiet. Dapi lu ein 22 onns vargai. Stauncla eis ella buc. Il cuntrari: NoFuture s'annunzia cul tschunavel disc cumpact.

AUGUSTIN BEELI/FMR

Las atgnas cumposiziuns el stil da brass-rock, funk e reggae han ils quater cumpogns registrau professionalmeim el studio Powerplay a Turitg. Quels quater ein *Samuel Schmid*, il fundatur da 2001. Lu *Armin Candrian* ch'ei vegniun ella formaziun pauc meins pli tard. Cul posau-nist *Fabian Sgier* in onn pli tard ei la band ida en direziun ska-punk reggae e crossover. *Andri Arpagaus* ei vegniun 2010 ella band. Cul musicist talentau ei No Future dapi 13 onns ella medema constellaziun. Aunc avon haveva la band ediu dus albums. Gl'emprem, «Wohri Frundschaft», ei cumpariu 2008 ed il secund «Absolut Porno» in onn pli tard. Mintgamai denter 550 e 600 persunas han visitau lu il batten ell'aula dalla casa da scola.

## Ils 15 d'avrel batten da «XII»

Era il tierz album «il mument», 2011 ei staus in success ed il quart «Chapters of Life» il 2016 medemamein. No Future ei la band profilada da Glion e contuorn. Igl ei buca mo ina band locala. En quels onns ha ella sunau agl Openair Lumnezia, agl Openair Scharans, agl Indoor Festival a Mustér, el Bierhibel a Berna, a Sogn Gagl, Lucerna ed en auters lohghens. En tut ha ella sunau a varga 200 concerts. Las atgnas cumposiziuns suna e conta la band en dialect grischun, en



La band igl onn vargau, a caschun d'in concert, (da sen.) Fabian Sgier, Samuel Schmid, Armin Candrian, Remo Derungs ed Andri Arpagaus.

FOTO AUGUSTIN BEELI

engles ni era en romontsch. Tuts quater commembers dalla band tschontschan lu era romontsch.

Il batten dalla tschunavel schiba seigi ils 15 d'avrel 2023 ell'aula dalla casa da scola a Glion, communichescha No Fu-

ture. Igl ei il punct culminont d'in project che ha cuzzau 12 meins. Mintga meins ha la formaziun ediu ina single che las medias socialas han derasau. Gl'emprem dils 12 tetels, «Nüm allai», ha la band publicau il marg 2022, il zercladur

ei il secund cumpariu «Numanumand». Lez sereferescha sil militier ed il song «147» che ha giu atenziun naziunala. Il fenadur ei lu la single «Lago Maggiore» cumparida ed ils ulteriurs meins dil 2022 tochen il mars 2023 ils proxims.

Ils stils predominants da No Future ein oz rock, pop, funk e reggae. Ins savess cumparegliar No Future cun 77 Bombay Street. Ils songs ein buca mo ritmica e bumbum. No Future fa musica cun bia melodia, ils videos accompognonts pleins cun humor e bunas ideas. Ed aunc zatgi essenzial: ins capescha il text, vul gir la historia ch'il cantadur Samuel Schmid conta. Apropos videos: «Nus havein giu la quida da saver luvrar ensem cun *Roman Schmid* (camera ed editur dil filmet, cun referenzas tier SRF, RTR, RSI) ed igl actur e cabarettist romontsch *David Flepp*», scriva la band en sia comunicaziun allas medias.

## Resultat da 12 meins creativs

Gl'album niev batregia la band puspei cun ina fiasta ell'aula dalla casa da scola. «Sche pusseivel puspei cun 500 persunas», fuss il giavisch dils musicists. Sereferend all'acziun che ha entschiet avon in onn sunema il disc niev «XII». Ils 12 meins vargai ha No Future mussau creativitat cun 12 canzuns festgas e pleinas d'energia. «Nus selegrein sils 15 d'avrel», excloman Samuel Schmid (lead vocals & guitar), Andri Arpagaus (backing vocals & bass), Armin Candrian (drums) e Fabian Sgier (trombone & keyboard) ed il musicist hospitant *Remo Derungs*.

Il niev videoclip da No Future ed ulteriurs informaziuns anflan ins sut: [www.no-future.ch](http://www.no-future.ch)